

卑窩集

坤

5563.8
8222
v.2

BERKELEY
LIBRARY
UNIVERSITY OF
CALIFORNIA



卑窩文集卷之三

祭文

祭洛厓安丈

日履

文

竹溪之水源滾流長延及後世以儒名鄉恭惟我公
益彰厥聞主盟士林扶植斯文惟嶺以南仰若山斗
德宇宏渙資質清粹服訓家庭早聞詩禮篤學修行
善述善繼因心孝友至於敦睦推以及物誠意款曲
恤窮濟仁急難高義至若文藝乃其餘事司馬之成
曷云展抱衛道尊聖倡率章甫抗章叫閭義重言危
中間沮抑公議莫施旋被竄逐北塞遙漠備嘗艱險

鬚髮如昨金雞放還歲月斯速凡在鄉邦疇不欽服
顧此小子受恩最厚洛浦邨居昔鄰棟宇朝暮趨陪
講禮論史隆眷深愛命面提耳有來問難酬應如響
多士全集各滿所望非才非德曷能若是所以服公
佩在心髓庶幾百年永蒙諄誨後生無祿德星遽晦
安仰之慟豈獨我私南士失色殄悴之悲睠言公家
梧竹翠蒼無替舊誼胥勉相將星霜不淹奄忽周禩
一慟以歸萬事永已

祭都事南公

溟翻文

惟靈重厚樸訥任真守拙天資純實踐履詳密持己

接物不事矯飾表裏如一坦夷真率篤志力學杜門
誦讀早通經術聲名藹蔚龍門點額鵬程搏翮遠大
前期旅食京師宦路蹉跎柰時運何晚承恩渥新除
蓮幕闢塞負漠去就未卜按轡回轅將告先原南望
故山衣錦而還百里馳驅二豎嬰軀龍仁之道呻吟
昏倒扶護牀褥只有一僕僅視醫藥徒事錯愕沈縣
五日竟至奄忽是何虐崇局促蹉躓暫聞病報凶音
繼到始疑其誤終焉因措皂蓋丹旌聯翩并行夢裏
哀榮可吁可驚有婦呼室有兒迎紼瞻聆慘切梁摧
棟折親朋涕洟行路齎咨矧余哭私尤非等夷世共

東坡先生集卷之三
二
停住鄰接棟宇諒分深厚爰及鹵莽恩重一字義同
三事諄誨在耳感入骨髓中年以來汨沒風埃從頌
獲陪迨不幾回庶擬佗年投笏歸田講論周旋從事
如前人事差池物換星移公今至斯憂復何爲愴念
疇昔未罄衷臆幽顯永隔庶賜歆格

祭李郡守士元

昌順文

恭惟令門種德深長受天陰隲降福穰穰科慶壽秩
赫世熒煌公能繼述妙年立揚郵官縣郡累佩銅章
鴻臚贊相珮鳴璫璫豈曰展布亦顯其光是其餘事
視履考祥真寶地頭硬著脊梁芬華外絕誠信中藏

約已敦親勤儉慈良賙貧恤窮無媿義倉是公實德
匪我虛張宗族之稱我聞其詳爲善之報益膺無疆
仁齡之享八耄強康餘慶之流錫類熾昌一子八孫
箇箇圭璋人曰完福世無與方顧此駑劣叨廁朝行
昔宦京洛幸共翱翔羈旅千里對榻聯牀升沈有時
聚散無常邇來幾年隔阻兩鄉各牽憂故間闊逢場
雲樹東西每切瞻望我有私感在肚敢忘昔先君喪
奠誄來將暨葬先妣賻以薨梁曳衰趨謝見掣禮防
謂待佗日忽報云亾八耄歸化公何憾傷惟余悲慟
涕淚漉漉孤露人世更誰依昂幽明一別奄忽三霜

靈筵將掇墓草已荒晚矣薦觴庶賜洋洋

祭鄭上舍

翊夏

文

嗚呼公之年六十有五壽非促矣子孫盈于庭福未艾也而今公之亾也人莫不齎咨涕洟慟惜而追思之此曷爲而然哉竊惟公風儀拔萃聰明過人從事文墨早占司馬而晚又徬通醫學人有疾病必奔走而救之其深恩厚德之被於遠近者豈淺小哉至於行己接物之間惟以和順樂易爲主不拘束於小節不汨沒於塵冗常與親朋好友醉醒於罇酒之間團圓於諧笑之場而未嘗以愁苦之色忿厲之氣發於

己而加諸人以至僕隸走卒之賤而亦必以寬柔仁
恕待之蓋其天性然也豈假借修飾之所爲哉向所
謂齎咨涕洟慟惜而追思之者此爾嗚呼在諸人猶
然矧如小子之世分甚厚倚仗甚重者耶公於我伯
父同年甲於我家君長七年自少至老情愛之切無
異天倫暨我從昆季與公之諸胤亦不替舊好而有
兄弟之義小子之仰公何間於子弟之於父兄哉不
幸年來兩家禍變孔酷乙巳冬我伯父奄忽棄背翌
年春公又棄後生惟我家君恆抱踰踈之悲而後生
輩永失依仰之所小子之慟曷有極哉抑小子別有

抱恨於私心者何歟歲乙巳小子莅邑于湖南其年多公以一書寄來首弔伯父之喪而哀傷惻怛之意溢於文辭次問兒子之病而藥餌救療之方詳其教諭其勤勤懇懇之意有足以涕泣而感歎者矣湖嶺夔邈信使稀闊其翌年正月始以復書謝之其僂未及達而公已棄斯世矣又况計書承聞乃在於最久之後而歸哭靈筵始在於既襄之後嗚呼公之疾我不得候沒而不得憑其屍葬而不得臨其穴向所謂世分之甚厚倚仗之甚重仰之如父兄者盡是空言而已矣此非小子之抱恨於私心耶嗚呼去年今日

卽公之初暮也小子之自湖罷歸才及於其時而適有哭子之悲又不得奠一柩告一辭今始以數行蕪語略布其平生依仰之情今日痛恨之私靈其知耶不知耶其亦降格於斯耶

祭洪臧叔

聖龜

文

嗚呼公之棄斯世一暮有數月矣墓草已宿今始來哭此何人哉病而不得省視沒而不得奔哭葬而不得臨穴暮之日又不得奠一柩告一辭實緣事故之大有拘礙豈非小子不敏之罪而向公誠意之不足也耶嗚呼公之於小子親誼之密何如也情意之篤

亦何如也。粵昔曾王考迎先府君於甥館授之田宅而居之。我先君兄弟於先大人事之如慈父視之如同氣小子。雖未及見當日事而蓋嘗聞而知之。至於中年公撤還故里而源源款款於我先君伯仲之間者則目見而心知之亦久矣。逮夫乙巳年間小子有奇病就醫藥於公家。其時先從大母在耳。愛我憂我視之如己。出保之如嬰兒。公之待我亦如大母之愛我。湯炳救疾之節一以至誠至五閱月而不怠。深恩在心何敢忘也。嗚呼邇來十數年間人事尚忍言哉。先大母已謝世。公兩弟之夭逝又先於大母我先君。

兄弟次第淪沒內外兄弟所依仰者惟公而公又至
於斯孤露餘生于人世何如也嗚呼公有端雅出塵
之資有清淨寡欲之操蕭條白屋簞瓢屢空而公能
安而受之未嘗有憾憾之態彼世之營營苟苟汨喪
其心性者視公其高下爲何如哉嗚呼以公世德之
厚志行之高宜可以食報於身而七十人世只喫著
無限艱苦是何天之不可諶而理之誠難推也嗚呼
昔我來拜公必欣而迎之今何寂然而無所見也昔
我有言公必諄諄而教之今何漠然而無所應也草
堂之主人已非栗里之風煙如昨我懷之悲曷有其

東坡文集卷之三
極一枯之奠不足以薦吾誠數行之文不足以敘吾
哀靈其知耶不知耶

祭外舅安公

守弘文

嗚呼昔不佞之聘于公家也公二弟聯牀一男克家
矣越二年癸巳公之獨胤不起後六七年仲季公又
次第零落公之所賴者獨二女若一孤孫爾小子外
人也雖不足輕重於公家區區憂念之忱何嘗不往
來也歲乙未小子獲忝科第遂出腳於世路自此省
候之疏闊或至一年二年雖在遠遊之中一心係慮
於公者則未弛也而所恃公之體度強健家事庶有

所收拾也逮至乙巳小子乞暇還鄉繼而有湖邑之
除遂卽上京拜恩命自京而又直赴任所蓋其事勢
有不得不然者而其間一未往候及家眷之搬去湖
衙也聞公親到浦邨送行甚喜旋復飲泣不能語云
小子亦揣公之心事而悲之也到湖後輒被荒政所
纏縛去年九月始得由歸聞公患泄痢浹朔沈淹不
勝驚慮而官守不可久曠由期又甚促迫故只以伴
書替候曾未數月遽承凶音嗚呼尚忍言哉湖嶺重
漠訃使之來過了許多日雖欲來哭於殮殯之前已
無及矣矧以職事有守不得擅離者耶嗚呼公之臨

化道懷者追聞於人蓋其大款最在孤孫之未及成
立次及於小子之夫婦至患已革舌已縮而猶有眷
眷提說嗚呼公之平生所望於小子者甚不輕而卒
以隔天涯別死生爲至恨也耶抑向之飲泣於送行
之際者乃是永設也耶嗚呼公家之望只在於孤孫
之成立嗣續之連緜而天旣禍之又將福之耶嗚呼
小子之解官歸庭在於今正而長兒之昔年奇疾添
傷於寒程搖撼僅到故里旋即溘然親屬之相關不
以幽明而有間則九泉之下其或垂憐於此兒耶言
之至此不覺腸摧而淚迸也嗚呼公其知耶不知耶

祭妹壻安

泐文

嗚呼君與我爲兄弟者二十餘年于茲矣其所以愛之切而倚之重者何間於骨肉哉阿妹不幸短命而猶有一男女彼此源源之往來款款之情誼未嘗少衰也以其從遊之久而有所深知夫君之心行也入而孝於親友於兄弟睦於宗族出而應事接物無不周到此則人或不能盡知而我獨知之者也卽今世衰俗偷人物渺然如君者豈易得哉但君素多疾病性且嗜酒或至過飲心有火而不得調制吾嘗爲君憂之戒之以節飲勉之以安心而空言無施此乃賢

者之偏處而不能克將去也然君氣足以敵病酒未
嘗及亂丁卯春遘疾頗重而竟能轉危爲安向之所
以憂君者於是乎賀君而竊謂自此庶可以無恙而
遐到矣昨年巨創出於劇病未蘇之餘因有厭食萎
茶之證奄奄昏倒不能自振然見其神色不似抱病
者然醫家亦以爲脉度如常以是爲信不曾以死生
慮也三月念間往診之神幻肉脫大異前日之所見
而已有不可爲之兆矣於心驚憂含惻而歸歸而帶
兒醺啓遠行盤礴十餘日而始返未及更診而凶音
遽至嗚呼尚忍聞哉以君之心行而至於斯耶四十

光陰倏然如夢仁者之壽果止於此耶天果不可必
乎嗚呼君嘗語余曰吾生而苦不若死而安余以爲
過也而可見其言之發於不平也今之歸也果如平
日之所云而無所係戀於人世耶持服而逆人理之
所悲而歸侍泉臺猶解終天之痛耶諸孤之呱呱目
下之所慘而五箇兒郎豈人家之所恆有也至於後
事雖有所可念者而有非今日之所可逆覩不必攪
長逝之魂也所卜幽宅卽檜谷之舊山雖未與妹葬
同壙一岡從之魂必不隔爲傳此人間孔懷之痛於
我妹也言之至此尤不禁潛泣也

祭安濟卿樓文

嗚呼濟卿將何歸乎上有八十老親疾患沈綿下有
滿室子女婚嫁未畢其何忍舍之而長逝乎嗚呼慟
哉自丙寅外姑氏捐世之後兄家禍變一何酷也丁
卯春仲君不起於痘去年冬其第二兒夭折於紅疹
兄又至斯人生稟命各有長短不係於家之禍福耶
昔在己酉不佞醺于兄家自是有以溪知兄家巨細
之事舅姑氏溪恩厚德宜可爲受福之基兄之伯仲
季亦皆稱其家而白眉最賢才可以立揚行可以幹
蠱行己忠信處事周全可以棟梁于一家竊謂兄家

後來之福將未艾也今乃大謬未知禍福無常天理
無徵而然耶最可悲者兄無一子季君亦然仲君之
一子不得不繼兄之後而尚未長成勢極孤危前頭
人事未知其泊於何地也嗚呼自我有兄弟之誼我
往而兄來見喜而別患相好數十年之間未嘗有忤
言逆色庶幾此樂可期百年孰謂前冬一別倂成千
古永訣也耶未聞病報忽傳凶音兒少痘疾一時相
妨病未視醫死未撫柩而今聞窆窆在邇又適喪憂
之掣竟負臨穴之一慟嗚呼此恨曷有窮已使兒代
奠卽我情也使兒代哭卽我哀也靈其知耶

祭權君馥

桂文

禮有六行其一曰娫惟我兩家舊託懿親遊從往來
自是頻頻以知其心以服其真交際之間不設畦畛
赤牛之秋又附新姻青眼相對白髮俱銀話古談今
悲喜交臻公時愆度久臥漳濱神觀雖瘁笑語津津
臨分畱約昨年之春事故敗意西望馳神早晚一會
尚期佗辰公不我待遽作古人奔哭之儀久乃得伸
舊宅徒存音容永堙觸目興懷有淚霑巾惟公平素
受嘏維純田園樂業旣不憂貧箕疇遐壽又迫八旬
獨胤克家人抱席珍世間百福備公一身想應英靈

瞑視就窀青烏卜吉丹旒啓晨歸櫬故里水咽山顰
顧此衰慵莫隨喪輶薄具短誅使孫替陳情意感通
死生惟均不昧者存歆此明禋

祭具子亨

與泰文

嗚呼人生斯世享得期頤之壽而以天年恬逝於牖
下猶且爲生者之悲矧百年未半奄忽於一朝之變
者耶嗚呼今君之沒果命耶非命耶謂之命也則古
亦有屈原尾生之事謂之非命也則聖有巖牆桎梏
之戒吾何能容情於其間耶以君溫厚之性度軒昂
之儀標需世之才急人之義忽忽付洪流萬頃之中

而滔滔以逝耶已矣慟矣顧念吾兩家隔在葦航之地自來世分與佗迥異君又聘于吾門姻誼益篤有事必相議有急必相救徵逐謁徠不相闕也見之則欣然討懷不見則黯然銷魂雖伯仲墳簾之樂無以過此者遽遽作一場華胥也耶嗚呼痛矣風泡一世曾不幾何而吉凶脩短畢竟同歸則吾亦非長生人也泉臺之下亦有朋友相從之理則攄此人世未盡之懷庶有其日耶言之止此君其知耶不知耶

祭全姪以德文

嗚呼君家禍變何其偏且酷耶尊府君兄弟不幸早

世君是兩家一子也宗祀無託君乃爲世父之嗣於是而我妹有子將縣縣繼世君之一身不亦重乎君天性純粹人事夙成入而事兩慈堂克盡誠孝年前我妹有重疾幾至危革而晝宵扶護嘗藥克勤竟至回春此實吾兄弟之所嘗稱道也至於治家奉賓祭亦周遍無闕失得人稱譽但氣質虛弱家勢孤危是所隱憂而爲慮者矣嗚呼一疾沈縣終莫之救倚伏無常果至此哉于斯時也猶有可慰而可望者君有一子年雖幼而骨相頗俊偉此若無恙而成長君可謂死而不死矣曾未一歲又失此兒至此而無可望

矣無可慰矣嗚呼蒼天此何爲哉只今所當爲者惟在於繼君之後而至親無可者將欲廣求於同宗之家此則希仲任其責矣君之平日倚重於希仲者果能辦此一大事使君兩慈堂有所依賴宗祀不至滅絕耶此不但吾輩之所冀望君必有恃於冥冥之中矣

祭安上舍子仁文

惟靈清粹資稟激昂意氣子諒之仁急難之義旣仁且義待人持己隱惡揚善問生弔死實出天性非由假僞恭惟公家儒風有自公能繼述夫豈失墜兀兀

劬書焚膏繼晷十年研磨懷抱利器顧今科舉多爲
人累公獨不然拔萃出類名下奔趨雲集風靡迷程
前導如車南指晚中司馬世趾其美豈展其才將期
大試中道奄忽茫茫天理如嗇其年胡豐其畀德門
梁摧鄉黨運否匪夫人慟而復誰爲况我哭私匪佗
人比昔鄰棟宇洛水之涘居斯遊斯自枉童穉先府
牀下數叨陪侍時承誨諭面命提耳釋疑訂訛句句
字字詎敢忘德佩服心髓施及于後不替舊誼有患
相救有事相倚情深分密如晁若季不幸中間人事
乖異兩地分張一心瞻企我往不數冗故所使惟公

之行頻到故里來必相訪無或我棄逢場盡歡罇酒
局戲雜以諧笑可知其喜往歲清遊偕數君子理屐
攜筇浣齋蕭寺要我惠好抵書喚起病未赴期恨在
肚裏謂於他日更續好事豈意我公遽至於此昨年
之冬託我小紙事雖細微認出相恃緣我不敏竟負
勤意公豈爲咎我實自媿窀穸告期親朋咸萃故宅
依舊儀形永闕伯氏在牀皓首涕泗棘人守殯纓纓
羸毀以公友慈何忍舍是略敘情素敬薦縣漬不昧
者存庶幾歆止

祭伯父處士公文

嗚呼府君之棄斯世倏爾再周年矣儀形漸闕警效
愈邈已矣何及痛矣何極嗚呼府君平日眷愛於小
子者何如也而生離死別之間終有所抱恨於無窮
者耶小子自登科筮仕迄今十餘年遠遊之日多侍
側之時少矣粵在乙巳小子以京職乞暇還其時伯
父纔經重患顏範憔悴氣力漸掇起居酬應之節大
異前日久離之餘驚慮不已時有湖邑除命上京拜
命自京而又赴任所府君之當日喜悅雖若小慰沈
縣中愁患而小子遠離之慮有倍曩時也到湖之後
時憑往來伴書得聞患候稍稍向安且於家眷搬去

之日伯父陪祠版到商山又以早晏一臨湖中之意
丁寧下教小子喜甚曰既有千里動駕之詔可知氣
候之復常自是頓弛昔日之慮後數月不復聞患候
之憂發遽承實音嗚呼痛矣尚忍言哉湖嶺夔漢計
使之來過了許多日殯殮之前雖未能及聞卽奔哭
豈容小遲而適湖邑大歉賑政方張欲請由則爲長
官之所阻遏欲浚歸則又分義之所不敢情與勢乖
私不勝公晏然蹲坐但自悲鬱而逮至窀穸竟違臨
穴嗚呼伯父平日眷愛於小子者何如也而疾患之
日旣不得扶持屬纊之際又不得省視殯殮而不得

執事送終而不得臨穴茲豈非小子之抱恨於無窮者耶嗚呼仁慈之德溫雅之行宜若膺純嘏享遐福而汨沒艱危愁苦而終天理無所徵也惟是諸從兄弟俱克家不墜先業而諸孫嶷嶷府君裕昆之餘慶庶可驗於此耶嗚呼小子罷官在客冬宦路榮辱固不足有所欣憾而長兒之昔年奇疾添劇於寒程搖撼僅能抵家旋即溘滅慘毒情境豈忍堪耐嗚呼居諸遄邁喪制有限此夜旣晨靈筵將撤自今以往陳迹而已哀患積中略陳萬一庶幾鑑臨諒此情曲

祭從兄拙菴公

重泰

文

嗚呼公之享年七十有二是固人間之稀壽也有子若女婚嫁幾畢而內外孫曾已至八九則亦可謂垂裕後昆矣風燈泡沫之裏如是而生如是而終宜若無憾而今公之歸也失聲長慟而不能自己者何也公少研經學久遊國庠京鄉人士之知公者莫不期之以立揚而志業未伸竟汨沒於窮廬喪禍又鉅仍一體之胖合再鰥而兩兒之夫婦俱歿淚眼無乾時愁眉少展日至於早孤之孫兒未笄之季女俱公平日之關念者乎嗚呼公質美而德厚守己以拙與物不競宜可以克享諸福而卒無徵焉天道何其舛也

嗚呼一家長老次第淪落惟我兄弟行中兄爲高年
又奉承宗事弟之所倚重而依仰者惟公爾一堂相
會書而繼夜笑語怡愉之樂永矢百年而公今至斯
夏將安仰登公之堂斐几淒涼警歎冥漠佳城長閉
厚夜難晨從今以往陳迹而已我懷之悲曷有其極

祭從兄處士公

重恆

文

嗚呼天之降割于吾家一何酷耶自冬至春老成之
喪幼穉之夭非止一再人家慘禍豈有如是者哉念
昔吾家從兄弟六人一堂會合其樂怡怡內而營家
外而禦侮有所恃而不憂公又質直勤儉刻意做事

始有勞苦空乏之患而終能成立家業得免衣食之
艱此實吾羣從兄弟之所不及也惟是命道崎窮生
子不育晚托螟兒而得兩孫庶有垂裕之望而祖子
孫三世今無一人存者悠悠蒼天此何爲哉從嫂氏
之喪臨時立後蓋出形勢之萬不得已日後承家猶
不至淒涼而宅姪夫婦之殯姑未免無所依歸誠可
悲矣惟公平日慮事周詳靡有闕漏而至於後事獨
有不預之悔及至病勢已極有此慮後之遺言而神
慌語澁未究節次嗚呼痛哉宅姪後事公之遺命固
知其意有所在而第念繼子之有二禮法之所無且

世變無窮人事多舛式遵遺命終有難僂將與第三從氏爲相議變通計未知公靈以爲如何也耶

祭亾室淑人順興安氏文

嗚呼君胡舍我而去耶我可舍也獨不念諸子女乎晚育之女未克成就有若赤子之在乳下此豈至情之所可舍耶君在世之日仲兒在千里外君病裏係戀此兒有須臾無死之願而對余無是言者蓋恐添我之慮而傷我之懷也及其變出奔喪叫號之狀行路亦悲况爲其父者乎今年癘氣彌滿邁之者十不全一家本多眷有難渾染始痛之際即使移避於仲

婦家無或以吾不善處而使之妄動耶仲婦之扶護
出於至誠而察證試藥吾不盡善耶嗚呼爲夫婦于
今二十有八年而君年少於我十八君之死當後於
我君常悶我之衰老有時憂形於色豈意今先我而
逝耶君性質美而孝於舅姑奉養葬祭俱無憾撫愛
前育無間已出前育有過恐我聞知君實吾家之孝
慈婦也凡此德行鄉曲之所道而今焉已矣烏可不
痛惜之也

此下缺

祭從姪

翰龍

文

嗚呼汝何歸乎父母在堂弱妻在室有子若女俱未

成長汝今舍此而歸無所係戀耶歸路遽邈更見無
期送汝之歸吾何能不哭之痛也嗚呼人生脩短各
有命汝年三十六也天之賦命於汝者果止於此耶
汝稟質重厚立志勤實此皆得壽之徵而不幸短命
豈其稟於有生之初耶嗚呼汝自志學受經於余聰
明穎達誦讀若浚河且能俛焉孜孜年未弱冠已能
通七書立身揚名乃汝分內事耳吾門後生有望於
進就者惟在於汝庶幾早晚騰騫張大門戶而藏器
待時鬱鬱不伸至於病已革神已爽而誦經之聲猶
不絕口蓋刻意積慮於攻業者到死而尚未忘也嗚

呼從兄侍失汝之後頓無生意形雖存而心已死矣
况料理葬汝勞費老朽之神思汝何以汝之所當憂
者反使老父而憂之耶言之至此尤不覺淚漣漣也

祭從姪世宅文

嗚呼人家禍變之不可原有如是耶昔汝兄弟四人
汝其季也吾從兄弟中獨伯從兄有多男之慶不意
伯姪短夭於甲辰年才二十五而其婦先一年而亡
第三姪又不起於丁卯年才二十八而其婦之亡在
五朔前從兄喪出於庚午之五月才經一暮而汝夫
婦之先後死在數旬之內汝年二十四也三兄弟皆

未滿三十而短命夫婦之俱歿皆在一年之間嗚呼
禍變之慘世間寧有是耶從兄厚德宜享裕後之福
而始有四男若可以食報汝之天性純善亦可以遠
到而汝二兄俱不得終孝汝又不得終喪嗚呼天曷
故焉汝之兩兒亦隨爺孃而俱逝了無形迹之畱於
人世者天乎鬼乎胡寧忍此嗚呼悲夫况汝繼仲從
氏之後庶有克家之望而今焉至此仲從氏命道之
崎吁亦甚矣尚忍言哉汝之幽宅卜於馬山古寺洞
上麓距先塋甚邇夫婦同穴庶慰九原之魂而兩柩
并行一時入地地上人之慘目傷心當何如也和淚

爲文言不盡意汝其知乎

祭孫婦襄陽權氏文

嗚呼吾年已七十矣非不知死生之有命哀傷之無益而今汝之亾也胡使余哭之痛哀之過而不自知耶汝夫婦皆早失母艱難長成情勢相似而甲子又同則汝夫婦之爲配耦非偶然也孫兒愚鈍失學多貽乃祖之憂而汝資質穎悟性行柔順實爲吾家之福也余心竊喜之自以爲得賢婦而愛之重之一念何嘗少弛汝之歸寧情所不已以其有娠也係慮不少今年正月初產報忽至而去臘之晦解娩極順且得

男子余心欣悅豈有涯耶余至稀壽而始得曾孫以
稀慶名其兒汝必聞而知之矣余適有遠行盤礴十
餘日而還始聞汝有病而方事醫藥謂可非久就安
藥不責效病漸向危終莫之救嗚呼是果汝之稟命
於天耶抑吾家禍殃之所延耶聞汝病中眷念新生
而不能一乳汝何忍舍此而去耶彼中無以乳養攜
來此處寄託性順而多乳者可免啼飢之患若使渠
無恙而成長汝之冤庶有慰於日後而汝之迹亦不
泯於人間矣今之所望惟在於此天果陰護之耶汝
亦冥佑之耶嗚呼死當有葬葬必擇地而今將附汝

於先妣之原亾室之階下泉裏奉侍之樂果無異於
人世耶今汝丹旌過我家前汝之魂必彷徨於堂室
間而顧復於呱呱之兒矣艱收老昏之精忠略敘哀
懷之萬一一讀於靈前而又將納諸壙中使汝諒我
之心於九泉之下汝其知耶

墓碣

五代祖考嘉善大夫行龍驤衛護軍府君墓

碣

府君諱沚字清源姓鄭系出高麗尚書左僕射太府
卿諱穆六世祖諱龜齡始顯 本朝結城縣監 贈

吏曹判書是生弘文館修撰諱雍修撰生副司直諱
復周司直生弘文館應教諱渙寔府君之曾祖當燕
山甲子直觸主意被杖登配都下人相與嗟咄曰此
真弘文蓋指血迸朝服弘與紅音相似也祖諱允奇
生員考諱元忠進士娶缶溪洪氏通德郎復昌之女
生一男諱湜娶甘泉文氏掌令瑾之女生一男卽公
也自幼風格俊整性度寬重進士公每器之曰此是
吾家萬里長城旣冠隨事幹能不屑屑於科臼程式
事親極誠孝三十年如一日舍姪榮後榮邦失所怙
無所於成就公隨方調護學問得以日進猝當龍蛇

之變撫諭家眷頓定神精移奉廟主于帛箱中將避地安東旣而聞賊分二路一枝向安東一枝向尚州慮其爲中路所梗更欲別般措劃居無何防禦使助防將等怯懦不進託言清野焚列邑倉庫及民社貯穀處處火起煙焰漲天見之者錯認寇已迫蒼黃奔走閭閻一空公慷慨涕泣直欲爲國出力而一家瀕洞恃公爲安危計不獲已入大同山山距家未五里前臨大江巖洞深邃雖知其不可久居之地而邨坊相隨之人視以爲寧帖姑息度日五月初賊數十登九日峯耀兵揚威示將隨突山人以爲孤弱羣起

而毆逐之公謂賊怒去勢必大來不如違而去之姪婦韓氏及未笄之女姪合辭牢諫曰生地固未易死地尤不易捨此安去俄而賊果大至砲聲一起步騎遍野韓夫人與未笄娘遂緣崖墮水而死今之下崖巖卽其處也時江水漲溢火色呼吸公亦罔知所向與家奴平石扶護兩姪至江畔有二賊揮刃勇追入水未幾而溺死遂緣山躲伏轉入呂泉龍門山中陵谷幽祕稍可栖息雖在奔蕩飄泊之中教養二姪必以義方每遇先世忌辰弋山釣水薦獻之禮未嘗少闕又往來家後較檢親族屍身取次掩骸奉審各處

先壟使不至迷昧晚年遺二子書曰老峴吾父母墳
塋所在也汝輩體予意春秋享祀恪勤無廢壽八旬
朝廷以大耄超陞僉樞府君生於癸亥卒壬午葬府
南大同山乾坐配丹陽張氏有淑行墓祔左同塋異
室男榮閔將仕郎榮權宣務郎生三男長懋護軍次
熠次燠護軍繼男斗宗熠生三男長斗宗承護軍后
次斗賢斗瑞斗宗生二男長坎次珣嗚呼公孝友篤
至幹局裕如有經濟之具而不能見施於世豈非所
謂天也耶不肖固不能形容萬一然銍經鬱攸遺蹟
蕩然只恐人事推遷泯沒無傳爲無涯之痛茲敢略

敘生卒始終梗槩少伸追慕惻怛之私云爾

卑窩文集卷之三

三

卑窩文集卷之三

卑窩文集卷之四

附錄

遺事

府君諱重岱字國瞻號卑窩姓鄭系出東萊高麗
左僕射諱穆上祖也入我朝有諱龜齡官結城
縣監贈吏曹判書號三樹是生諱雍弘文修撰
以德行顯再傳而有諱渙弘文應教燕山甲子以
直諫被杖竄卒於尚州以上三世并享浣潭社自
是以後不樂仕進世有隱德有諱榮閑將仕郎諱
赫副護軍諱斗宗諱珣於府君爲高曾祖考也妣

月城李氏通德郎諱仁健之女也以肅廟辛未
生府君於龍宮縣憂忘里第自幼資稟絕異不違
父母所戒及上學孜孜不怠文詞與筆法俱就甫
九歲赴尚州公都會得鬼選主司嘖嘖稱奇指一
老儒向隅者謂府君曰觀汝才器必有將來之大
立揚今此小者不足道也推與此老儒可乎府君
卽時悛許聞者莫不交口歎賞自是以後潛心於
經史發爲詞章聲譽日播宿匠巨拇莫不推重焉
乙未赴明經科得捷隸藝閣爲副正字丁酉五月
拜奉常寺主簿兼副正字六月從諸寮進參藥院

引見 肅廟親問中國東國沿革年代治亂賢否
府君歷歷敷奏無所差錯 肅廟大加稱賞顧謂
都令曰吾聞史官之言多矣未有若此史官之博
洽明悛因問居地寵愛特深七月拜正字尋遷博
士戊戌拜成均館典籍十二月拜金郊道察訪兼
持平適歲饑饉府君出捐俸金賑救流民治化大
行頌聲載路道臣撫實啓聞 上嘉尚之遣文學
近臣諭賜表裏一襲青緞三段內廐馬二匹誠曠
代異數也壬寅拜黃海道都事甲辰五月拜司畜
署別提乙巳三月拜校書館校理六月以校理請

由歸覲是時湖南大歉以吏曹別薦特除務安
縣監聞命赴任荒憂轉浚民吏嗷嗷將至溝壑
府君推誠救濟闔境得安堵於是選文士肄業於
充養齋公退之暇招諸生講論文義考試詞賦而
朔望輒行鄉飲禮自是文化大興大歉之餘邑瘠
民瘼亦有所當矯救者以是累言于道臣而道臣
不從府君以理條陳辭氣正直以故見忤瓜未熟
而遽歸時丁未春也辛亥拜副司果兼文臣宣傳
官壬子爲正郎東西銓甲寅拜司憲府監察尋拜
司諫院司諫乙卯拜刑曹佐郎兼春秋館記事官

丙辰九月拜奉常寺判官丁巳拜梁山郡守蠲廢
救廢政簡惠洽土人皆頌其德服其化以海納米
到境覆船事翌年十二月遽歸自是絕意仕進事
二親備盡志體之養辛酉丁外憂居喪如禮孝奉
慈闈愛敬俱至母夫人行年八十八患候彌淹轉
至危革府君設壇禱神明夙宵不懈及復膳設宴
稱觴賦詩識喜當時諸名碩多續和之己卯遭艱
府君年踰耳順而能依禮自盡幾毀僅全每有時
物盛饌輒追慕如新時人謂之鄭孝子 英廟壬
午十一月十五日卒享年七十二癸未三月二十

八日葬于龍宮治東赤巖庚坐原配順興安氏處
士守弘女生一男一女男必敬女宋邦杓卒於丙
午九月二十九日葬委峯山卯向原後配順興安
氏處士汝止女生二男四女男必忠文科縣監必
弘出女具世祿吳衡國黃配大金挺鑛卒於丙子
四月十八日葬粉土谷壬坐原必敬生三男亨震
亨旭亨國必忠嗣子亨文四女南燦龜吳光國郭
鎮教李是琮必弘生一男五女男亨俊女權植李
沃李采斗李麟成權道正亨震生四男二女男仁
默義默智默信默女李宜敏權範九亨國生一男

光默文科持平亨文生一男一女男致默女朴漢
諄亨俊生二男一女男成默恭默女林周翰仁默
嗣子圭秉義默生一男二女男圭承女金啓宗朴
周郁智默生三男三女男圭秉出圭煥圭珀女安
復慶金枉憲鄭昌翰信默生五男二女男圭復圭
冕圭獻圭應出圭鎮女申命老金養泰光默嗣子
曰圭應二女李眺仁李海容致默生二男圭成圭
晉成默男圭壽餘不盡錄嗚呼府君風儀出類器
度淵確儼威方正而有閒雅寬容之像充積深厚
而有蕭灑發越之趣處幽加操省而不忘愔對人

簡言笑而致溫恭間以吟哦暢敘頤養精神日用
云爲無拘無迫綽有餘裕遠近知府君者皆觀感
而欽豔逮夫晚年掃靜室整冠衣觀玩披閱之工
少無間斷而尤好朱子書及退陶集沈潛反覆不
翅若芻豢之悅口而其於四子三經益講求奧義
了解發明多可傳者手抄少陵詩諷詠爲發舒休
養之資以書史園林爲餘年之計嘗曰晚年所得
較多於前日宦遊時云常存卑牧扁其室曰卑窩
以自省焉每長者車轍送迎相接不修邊幅誠遇
款待一團和氣溢於襟宇常與權清臺李大山諸

先生及安洛厓

日履

南都事

溟翻

諸公友道溪密

追隨講討書翰問訊源源相接大山李先生嘗謂
人曰使吾嶺人士皆得如鄭某何患今之不如古
也篤於追遠極盡誠禮而馬山卽先祖屢世衣冠
之藏而守護甚廣介以大江巡視甚不僂斧斤日
至幾至童濯之境府君倡議造艇以僂禁護自後
松楸蒼鬱且墓舍頽圯府君主管重修且經紀祭
田無有餘憾至於睦族戚信朋友惠氓隸咸得其
情也以若清裁偉幹大施於世笙鏞金石朝夕可
期而世途寢降公議不行立朝四十年常栖遑於

郎署郡縣之間此係時運耶甲寅在洛時步月沙
詩而寓懷其聯句曰報效丹心苦栖遑白髮多一
柘堪痛飲萬事欲狂歌此可見府君拂鬱之志也
嗚呼今距府君之世二百年所矣珠唾錦章尚在
巾箱懿行實德傳來於家間長老之口而不肖早
失庭訓同堂長老次第零落府君之姿志文行幾
乎泯沒而無傳惟是之懼不揆僭妄搜拾於家藏
古乘綴取乎先行傳聞敘次之如右豈敢一辭溢
美以犯不韙之科也幸當世大君子垂矜而立言
俾此幽光潛德不至淵淪千萬祈祝七代孫玄謨

謹錄

行狀

公諱重岱字國瞻姓鄭貫東萊高麗左僕射文安
公諱穆之後也入本朝有諱龜齡官結城縣監
贈吏判生諱雍弘文修撰再傳而有諱渙弘文
應教燕山甲子杖卒于謫以上三世并享浣潭於
公間八世高祖諱榮閑將仕郎曾祖諱赫副護軍
祖諱斗宗考諱珣世有隱德妣月城李氏通德郎
諱仁健女以肅廟辛未生公于龍宮憂念里第
幼聰穎絕人及上學不煩長者督九歲赴尚州夏

科得鬼捷主司大加稱賞仍指一老儒曰此冤屈也汝之才器後必大成不必區區於此推與此老何如公卽許之無吝色聞者大期之自是潛心經史筆翰俱進當世巨擘亦退縮焉年二十五文科授承文院副正字丁酉拜奉常寺主簿兼副正字是年六月進參藥院引見肅廟親問中華東國帝王家政治之汙隆享年之久近公歷陳上下四千年如誦己言上驚歎不已顧謂都令曰吾聞史官之言多矣未有若此史官之博洽明悞七月拜正字尋遷博士戊戌拜成均館典籍冬出爲金

郊道察訪歲適饑饉闔境嗷嗷捐俸金賑流民治
績大著道臣聞于朝 上嘉之遣近臣賫旨褒諭
賜衣一襲青緞三段廐馬二匹壬寅拜黃海道都
事甲辰拜司畜署別提乙巳拜校書館校理時湖
南大飢以別薦 特除務安縣監公聞命赴任盡
力救濟流民還定選才士居齋肄業公退之暇講
經旨課時文朔望行鄉飲禮未幾文化大興邑有
瘠民甚苦闢于營欲矯救之不聽公以理條陳辭
甚峻直道臣忤之瓜未滿而遞辛亥拜副司果兼
文臣宣傳官壬子爲正郎東西銓甲寅拜司憲府

監察尋遷司諫院司諫乙卯遷刑曹佐郎兼春秋館記事官丙辰陞奉常寺判官丁巳拜梁山郡守治化方大著而坐海納米船之到境臭載未幾見罷於是浩然賦歸謝絕名途專意家政事二親極殫誠孝前後遭艱一遵禮制哀毀過度時有鄭孝子之稱文學以迪後庭又有科慶敦睦以御族里有融和之風年七十二考終于寢 英廟壬午十一月十五日也翌年三月二十八日葬于治東赤巖庚坐原配順興安氏士人守弘女生一男一女男必敬女宋邦杓後配與前配同氏士人汝止女

生二男四女男必忠文科縣監必弘出女具世祿
吳衡國黃配大金挺鑛必敬三男曰亨震亨旭亨
國必忠嗣子曰亨文四女南燦龜具光國郭鎮教
李是琮必弘男曰亨俊五女權植李沃李采斗李
麟成權道正亨震男曰仁默義默智默信默二女
李宜敏權範九亨國男曰光默文科持平亨文男
曰致默女朴漢諠亨俊二男曰成默恭默女林周
翰至今七八世内外子姓多不能盡錄於乎公以
嚴毅方正之資兼之以寬恕仁厚之行以聰穎發
越之才加之以揆蹟博洽之工早登科第歷敷清

班啓沃之衷字牧之惠 聖上褒眷之庶民歌頌

之若將大施其蘊蓄而竟爲執政者沮戲卷懷而
歸東岡此時運所關也於公抑何輕重哉趨陪庭
闈備甘旨而適溫涼逍遙園林樂琴書而哦雲月
眞工日進倚望日隆而常謙謙不自滿取羲易卑
牧之義扁其室曰卑窩積古今書史循環熟複優
游厭飫而日邀經士韻人講究以發蘊奧嘯詠以
資敘暢如權清臺李大山諸先生洛厓安公傾心
相與往復道素唱和敘雅媿媿不已可見當時交
遊之正而嘗過徐上舍所居西峯山路傾仄艱苦

終日僅得坦道因誦鄒夫子舍正路不由之文感
吟長篇百餘句剖判邪正利義之路分析於險易
勞逸之歧反覆致詳可見爲學用工之先難後易
始近終遠也慈夫人年八十八患甚革公設壇致
誠久而復膳喜不自勝設酌稱慶遠近名碩感其
事歌詠其事屢世先龍隔大江省行不佞禁護甚
艱公造船不病涉楸柏自此蒼鬱而重修齋廬增
置祭田公之誠孝寔出於天也不佞宗門後生也
聞公之風夙抱高景之思日公之八世孫鎮華賁
其先人正郎玄謨氏所製遺事一通屬其再從叔

贊議恆謨責之以行狀之文揣分當辭而念昔與
正郎公相與之誼且自幸爲公而役不揆僭妄略
加隳枯以竢立言者裁擇焉

族後孫嘉義大夫行成均館大司成閭朝謹撰

墓碣銘

并序

竺山鄭君玄謨書囑不佞曰玄謨之七代祖卑窩
公窀穸之掩將百廿三年于茲而墓無顯刻事行
日遠恐遂泯沒而不稱以增不慤願吾子垂念而
闡幽焉炳昌執書而歎曰有是哉君之賢也蓋自
世級旣降人情寢薄人家子弟有能以紹述先志

暴揚先美爲意者鮮矣而況如君者早歲孤露年
力方富非有所受命而乃能浚追先故卒其未卒
卽其孝愛之篤有非夫人所能幾及顧愚實不文
有未足以揄揚德美以傳諸後耳竊怪夫君篤於
孝而歉於明託非其人以點重事是誠不得以不
辭但其屬意甚切有使人不容轉面則亦有不忍
於終辭輒忘其譴劣按狀而敘之曰公諱重岱字
國瞻姓鄭本貫東萊遠祖諱穆始顯勝國官尚書
左僕射自是圭組相承入我朝有諱龜齡官結
城縣監贈吏曹判書是生諱雍弘文修撰以德

行顯再傳而有諱渙弘文應教以直諫名燕山朝
被竄於甲子自是以後不樂仕進世有隱德有諱
榮閔將仕郎諱懌副護軍諱斗宗諱珣俱處士寔
於公爲高曾祖考也妣月城李氏通德郎諱仁健
之女也公生有異質父母所戒輒不貳詞業夙茂
又善楷法年甫九歲赴公都會於尚州所試中選
主司嘖嘖稱奇指一老儒向隅者見謂曰觀汝才
氣終當大闡小者不足道今且推與此老儒可乎
公應聲而許由是聲名益藉藉早通經學一意翰
墨難疑辯問發蒙浚河高步藝園一時儕流仰若

山斗乙未釋褐肆槐院爲正字丁酉拜奉常寺主簿是年六月進參藥院上問中華東國治政得失公歷陳無遺上驚歎之翌年拜成均館典籍尋遷司憲府監察當事不避有懷無隱恩遇日渥凡所奏對無不傾聽一日上謂都令曰以臺諫之風儀才德清官要職分當爲之除金郊道察訪兼司憲府持平適歲浸民多流殍公推誠賑救捐俸而濟之闔境賴安道伯李德英壯之舉實啓聞上遣文學近臣柳永采文以諭之曰郵官異於守令而盡心職事爲一道居首甚庸嘉尚

特賜表裏一襲青緞三匹廐馬二匹誠曠代異數也拜別提時金相國在魯名知人嘗謂人曰某也實當今國器乙巳薦除務安縣監邑廢民瘼難以爲醫治未一周事皆就緒官府如僧舍重修學宮養士立課朔望輒行鄉飲禮大興文化再蒙表裏之典裔是而清裁偉幹尤爲見推於王荀班壬子拜正郎東西銓甲寅拜司諫院司諫丙辰拜奉常寺判官丁巳出守梁山郡已而感陶靖節五斗之語投紱歸養備盡志物之奉辛酉丁外憂居喪如禮孝奉偏親敬愛克備母夫人以大耄終公年

踰耳順乃能爲禮不懈毀幾不全時人謂之鄭孝
子制終恬於仕進樂在方策壬午十一月十五日
以疾考終距其生 肅廟辛未得年七十二以明
年三月二十八日丑時葬于龍宮治東赤巖枕庚
之原公凡再娶順興安氏諱守弘汝止其考也前
夫人生男女各一卒於丙午九月二十九日葬委
峯山卯向原後夫人二男四女卒於丙子四月十
八日葬粉土谷壬坐原男長必敬次必忠文科縣
監次必弘出后女長適宋邦杓次具世祿次吳衡
國次黃配大次金挺鑄必敬三男曰亨震亨旭亨

國必忠嗣子曰亨文四女壻南燦龜具光國郭鎮
教李是琮必弘男曰亨俊五女壻權植李沃李采
斗李麟成權道正亨震四男曰仁默義默默智默信
默二女壻李宜敏權範九亨國男曰光默文科持
平亨文男曰致默一女壻朴漢諠亨俊二男曰成
默恭默一女壻林周翰至今六七世内外子姓多
不能盡錄今請銘者仁默玄孫也公風儀出類天
資絕異玉色丰容鳳毛奇采兼以學識通博嚴毅
肅穆之中有忠厚惻怛之意玲瓏灑落之中有渾
全深邃之趣豪邁發越若可以陵駕一世而其謙

恭儉約異於常人高大闊遠若可以不拘小節而
其細密精詳入於秋毫日用云爲無不豔人心目
爲肅廟器重出入臺省威儀動人上常目之
仙官其內行甚備善事二親遇齋必齋沐祝天母
夫人行年八十八嬰疾幾殆公涕泣虔禱卽有效
應於是設宴賦詩以識喜諸名勝多續和傳爲美
談自失怙恃每當時物盛饌輒追慕如新焉由親
而上篤於追遠事鉅細一皆經畫務盡至情始先
祖判書公之藏在馬山守護甚廣而介以大江艱
於巡視斧斤所加幾至童濯公乃倡率門族設小

初以優看護未幾松檟鬱然判書公供享之所歲久頽圯公又主管重修且經紀其田土俾無餘憾至於睦族惠氓卽其餘事之推耳逮其晚年端坐一室手不釋卷尤好朱子書及退陶集專精潛玩殆不知年數之不足也嘗曰吾之晚年所得倍勝於前日宦遊時云溪存卑牧扁其室曰卑窩以自省焉每花朝月夕逍遙泉石襟韻飄灑悠然有出塵之想交際之間洞去畛域和意可掬與清臺權公相一大山李公象靖洛厓安公日履友道尤密每相從講討亹亹竟日李公嘗謂人曰使吾嶺人

士皆得如鄭某何患今之不如古也蓋公之爲政
於家著稱於官矜式於人者其有所本歟嘗愛小
陵詩手抄而諷詠之其於七子用工深密講求奧
義了解敷演多可傳者噫以公之德之才嚮用於
時卽其所成就豈直寥寥云爾而遠巡縣邑栖遲
丘園含用沒世果孰主張是抑嘗聞之善積於躬
其後必大吾知鄭氏之慶方未艾也亦奚規規追
計乎一時之用舍爲哉銘曰

儀圖公賢展宣祿兮陸沈下位天胡嗇兮耽書養
靜休有光兮孝子不匱胤嗣昌兮其昌伊何世濟

美兮我銘在茲昭厥懿兮

崇禎紀元後四乙亥正月下澣通政大夫前行司
憲府執義金炳昌謹撰

墓誌銘

并序

在昔 元陵壬午十一月十五日卑窩鄭公考終
于寢享年七十二用翌年三月某甲葬于縣東赤
巖負庚之原距今百七十有九年矣迺者其八世
孫鎮華袖其先考佐郎公所撰遺事一通踣門而
語鴻洛曰卑窩先祖文集方鏤布于世而墓闕幽
窆之銘願執事嘉惠以一言鴻洛以老洫無文固

辭則其請有過於辭者遂不敢終辭按公諱重岱
字國瞻卑窩號也鄭氏之貫東萊者皆祖於高麗
左僕射文安公諱穆自後圭組相襲入 本朝有
諱龜齡官縣監 贈吏判生諱雍文科修撰數世
而有諱渙文科應教燕山甲子杖卒于謫所與上
二世并享浣潭於公爲八世高祖諱榮閑將仕郎
曾祖諱懌副護軍祖諱斗宗考諱珣世有隱德妣
月城李氏通德郎仁健女以 明陵辛未生公于
龍宮縣憂忌里第幼儀容出衆穎悟絕人旣上學
不煩教督而文辭日就九歲赴尚州夏科得鬼捷

主司矍然歎賞曰天才也因指一老儒而言曰此老冤屈也若年且穉讓與此老何如公許之聞者無不嘖嘖焉自後潛心墳籍而知俗學之外又有向裏之工孜孜用力造詣益高矣乙未擢文科授承文院正字丁酉拜奉常寺主簿兼副正字尋拜成均館典籍又拜司憲府監察是年六月進參議院問安上引見親問中華東國政治之汙隆歷年之久近公音韻清澆應對詳明上謂都令曰鄭某之博古通今未見其比予真嘉尚自後眷愛日注奏請皆聽戊戌拜金郊道察訪兼司憲府持

平適歲大歉民多流殍公捐俸金賑飢口闔境賴
安道伯李德英壯其行而聞于朝上遣近臣柳
永采賚旨褒諭曰郵官異於守令而盡心職事爲
一道居首甚庸歎賞特賜表裏一襲青緞三匹
廐馬二匹實曠世恩數也壬寅拜黃海道都事甲
辰拜司畜署別提金相國在魯見而異之曰鄭某
國器也乙巳特除務安縣監時湖南大飢務爲
尤甚自上擇差良吏而朝臣以爲非公不可有是
命公惶恐赴任惟能勞來安集未一周治化大
行再蒙表裏之典又選邨秀才子居齋肄業公退

之暇講明旨義朔望行鄉飲禮人至比之文翁之
化蜀矣辛亥拜副司果兼文臣宣傳官壬子爲正
郎東西銓甲寅復拜監察尋遷司諫院司諫乙卯
遷刑曹佐郎兼春秋館記事官丙辰陞奉常寺判
官丁巳出爲梁山郡守到郡未幾治績丕著公以
爲五斗折腰非丈夫之本志遂拔紱還鄉辛酉丁
外艱戚易備至未幾遭內艱公年過六旬而式禮
莫愆毀幾不全自後不喜榮途聊樂丘園惟以承
襲前修訓迪後進爲一心準的而優遊以卒歲公
凡再娶皆順興安氏前夫人守弘女卒丙午九月

二十九日葬委峯山卯向原生一男一女男必敬
女宋邦杓後夫人汝止女卒丙子四月十八日葬
粉土谷壬坐原生二男四女男必忠文科縣監必
弘出后女具世祿吳衡國黃配大金挺鑛必敬三
男亨震亨旭亨國必忠嗣男亨文四女南燦龜吳
光國郭鎮教李是琮必弘男亨俊五女權植李沃
李采斗李麟成權道正亨震四男仁默義默智默
信默二女李宜敏權範九亨國男光默文科持平
亨文男致默女朴漢諠亨俊男成默恭默女林周
翰以下未艾也公天稟甚高而濟以學力嚴毅肅

穆忠厚惻怛粵自童丱之時固已夔然殊異於人而早揚王庭忠足以補袞才足以范民而惟栖栖於閒班下邑不得展其所蘊君子之不爲大用自古然矣何獨公哉且公退守東岡也雖不無戀戀去國之愁而亦自有綽綽安身之道家庭之內肅雖若朝廷而奉養二親極其誠孝遇瘠必祝大夫人年老疾篤公叩頭北辰輒有效應於是設宴賦詩以識其喜當時諸益皆和之至今傳爲美事性又篤於爲先始祖判書公墓所在大江之東難於看護設小舫以便來往松蔭復密又修葺齋宇

經紀祭田俾無餘憾其行義之篤皆此類也晚年
持養已久踐履益坦靜坐揆蹟手不釋卷循環熟
複沈潛厭飫以善及人而信從者衆與權清臺李
大山諸先生講究經義往來筭束積於牀篋洛厓
安公亦同鄉之心交也嘗訪徐進士廷望所居西
峯傾仄難行因誦鄒夫子舍正路不由之訓感吟
追悔惟公所養之實卽此可驗矣取義易卑牧之
義扁其楹曰卑窩亦可見平日謙讓之德也鴻洛
孤陋寡聞何足以識公而嘗從先父老之後有以
得其一二而慨然以歎慕者遂歷敘始末而系以

銘曰

顯允惟公揚名臧際朝憚謇諤民蒙德惠王若曰
咨嘉乃衷赤栖遲散班未發其積樂彼之園返我
初服爲政于家不志于穀始終謙牧顧扁瞿瞿亦
旣知命亦旣飭軀諒公平生允爲矜式我銘無媿
永矢不泐

通政大夫前行弘文館侍講兼知制誥聞韶

金鴻洛謹撰

挽詞

進士李重穆

天昇經綸局家傳孝友心板輿湖嶺久歌頌峴碑

今桂窟從兒謁牙絃爲我吟忍聞封馬鬣不覺淚
霑襟

又

進士黃羽漢

王立亭亭珮王長東萊玄冑耀南鄉妙年功業惟
三綬晚景恩榮又二郎舊誼偏溪聯尺牘清談每
憶上華堂祇今萬事渾如夢叵耐臨風寫誄章

又

同樞鄭游龜

自少交情到老采清儀美質我偏知謙恭接物人
咸服文雅修躬世共推夢裏三刀榮養日案頭千
卷退休時臨終尚撫諸郎頤百福人間有一悲

又

李重和

黃甲功名早青雲步武平養專雙老日淚墮二州
氓利器堪盤錯明時遂釣耕全歸無一憾令子繼
家聲

又

進士李權

舉舉嶠南君子身妙年登第悅雙親自持清慎居
三郡高臥田園送七旬餘慶爭看聞喜日溪仁偏
荷策驚辰龍亾虎去今難作欲寫誄詞淚滿巾

又

進士金南九

文墨場中識面曾許君曾次暎壺冰第緣世路升

沈異徒費江天戀慕增壁水揩眸驚歲晏盤齋握
手感春燈隨看人事倏遷變老淚如傾悲不勝

又

鄭櫟

夏雲山蒼蒼洛江水泱泱中有浦內里卑窩子於
斯徜徉卑窩名家裔秀骨非尋常端雅儀容玉雪
香妙年刷輕翮飛搏蟾桂一枝芳袖藏冰蠶絲閣
步遊康莊再得專城養孝哉無與當謙恭忠信接
族而居鄉婆娑東里上閒送谷口二星霜從知積
善有餘慶試看一門多休祥滿前兒郎汗血駒婦
女左右趨衿囊人間五福誰能兼公能兼之又有

膝下注書郎嗟公此樂何輝煌不佞慕高義追遊
穩承款誨春復秋洛水陽聞公病有日踰嶺往視
牀那意別未久遽承善人亡燭齋一掬淚又向東
天灑新邱蕭條洛浦上爲誰理征航含哀題誄語
臨風一哭天地長

又

姜載

舉鄉爭頌鄭梁山咸悅誠心出肺肝早折宋花榮
馬首夏攀漢檄動毛顏貴能異志眞君子分外無
求是達觀生死俱全須莫恨庭前又有注書官

又

金鼎元

青雲藹藹起龍宮兩世榮光耀海東
蕭灑矜懷開霽月眞純操履挹清風
處仁幾感承殊眷聽緒偏欣發瞽蒙
卻恨江天潦雨裏未拚仙鶴上蒼穹

又

李 澈

謙恭雅潔一生持嶺士鄉人爭道之美
價早傾攀桂日奇才歷試佩符時栖遲
世俗風塵晚隱約林泉歲月移厚福全
歸何所感于門容馬夏能兒

又

尹德恆

樹亭亭下洛波漫中有深深學士關
早歲榮聲優翰墨古家遺範整衣冠
風儀第一南中客研履纔

三嶺外官搖落珮衿誰與玩注書郎在典型看

又

全景采

雅操謙恭迴出倫自天遐福驗由仁萱堂昔供三
牲養蘭砌今添一桂春早世清名鴈鷺列暮年閒
趣水雲濱題辭我有追先感席上餘香總舊塵

又

李寅馥

追遊一夢正依依風雨淒淒洛水湄孝著專城榮
老日才看利器牧民時青年桂籍兒能繼白髮江
湖獨自怡忍說前春酬唱事濡毫和淚寫哀詞

又

全明濟

可惜忠孝謙恭姿已矣如今難再覲哀哀人事燭
翻風欲說情懷聲更咽蟾宮攀桂昔何年藉藉芳
名滿京洛高飛仙影銅絰章三度雷封春有腳悠
悠晚界謝簪笏養真林園樂自足年隆八耄顏猶
童曄如珠林一仙鶴黃流斂豔玉鑽瑟仲胤又奮
溟鷗翼斑衣畫袍共凌亂德門榮慶何輝赫曰壽
曰富又多男孰如夫公享清福蟠桃春色暎屋籌
庶幾遐齡躡喬僦南天忽報壽星晦仙馭茫茫竟
何適吁嗟卽遠又有日千古一設增惻惻平生親
契向誰論老淚滂滂濕短幅

又

南以元

平日想公家世好相承
父子著朝紳功名燦耀三
州綬書史優閒七十春

儂今孰使天涯隔遽失重逢
忽計言情誼可堪存
沒異吾兒曾有及門恩

又

朴東臣

溫良氣質瑩然姿早折蟾宮桂一枝
天道誰云仁者壽世間深惜哲人萎
閒花疎竹前時色流水高山此日悲
玉樹庭中最挺出佇看餘慶永垂垂

又

張漢師

三祝華封豈偶言世間全福我公存人將雅範推
先進天遣殊榮裕後昆瑤海千秋靈樹老青丘一
夜壽星昏至今南郡畱遺愛餘慶分明種德門
十載商顏一拜公眞淳儀德古賢風束脩未及親
承誨執紼猶違遠送終搖落何山封馬鬣寂寥千
古鎖龍宮後生無處追良晤獨抱遺經恨不窮

又

李受鼎

好處元非存好官不須春夢說邯鄲三州佩竹人
皆有七十衣萊世罕看一子龍升餘可必諸孫鸞
峙慶應蔓幽明已作千年恨悵望空山月影寒

又

金吉龜

賢者容愚喚以兄顧慚駑驥各殊程家庭孝友元
根性雲漢文章自晦名兩郡一郵才豈展七旬百
福世無爭全歸且食方來報白玉藍田哀哀生
丹桂清香膝下移向來榮耀又今時仙輶忽棄三
牲養人事翻成一蟻炊經在韋家金不寶惠畱銅
郡口皆碑患披宿草衰無力伏枕吞聲倍自悲

又

金昌鴻

早達兼稀歲多公種德田家聲看謝樹經業有王
氈兩世立身地百年報善天居然存沒恨祇覺淚

泫然

又

具可徵

妙歲雲鵬擊海程功名事業足平生七旬龜筭三
男孝兩代龍升一世榮長謂人間綏福祿豈知泉
下隔幽明病違執紼緇詞誅瞻望丹旌淚滿纓

又

李 垌

如玉其人孝友誠大春庭下桂花榮早敷朝野聲
名重晚好林泉趣味清三達兼尊天所授二郎承
業死如生于門容駟寧全美應見紅雲繞子塋

又

門生南師中

青雲朝野早年名白首江湖晚計成無復係關身
外事有能全盡世間榮遼陽鶴去人咸惜丈席師
亾我獨驚臨穴拜辭長痛哭家鄉回首涕交橫

又

女壻宋邦杓

三珮銅章八耄壽謙恭仁善自天姿江湖晚契魚
兼鳥伊洛羣書案有師杖屨親陪偏荷眷棟梁遽
折不堪悲絲絲餘慶從茲驗寶樹盈庭桂一枝

又

族弟泰龍

雲嶽毓靈氣吾宗有若人三尊誰與比五福世無
倫美器溫如玉丰姿澄絕塵天才何綽綽文藝又

彬彬嶺外推佳士明庭貢席珍端嚴凝坐客敦重
儼朝臣非直人工妙兼看本質純專城殫孝思供
職奉昏晨餘慶天應畀休祥日以臻三蘭皆茁茂
一角最嶙峋雲路飛騰早長程步武仲儻非詩禮
教能致子孫因慶賀人爭獻謙卑志益新浮榮猶
外至清福樂吾真志遂投閒日望尊到老辰簡編
惟悅目吟詠每頤神蕭灑卑窩榻送迎長者輪慈
詳能愛物儒雅見持身隨分安通塞臨歧判主賓
交遊要必謹鄙俚不曾親通訓雖歉秩稀年是驗
仁溪喜門闌庇那知極宿淪淒涼空里巷嗟悼共

東坡文集卷之四
三
鄉鄰自顧愚情質偏蒙眷誨諄清齋看月夕洛社
玩花春肝肺何嘗秘追隨不隔旬孤露將安倣儀
形奄就寃題詞情未盡執紼淚霑巾

又

族弟泰健

有美吾宗老才調出等夷瑚璉堪作器冰玉是其
姿溫潤文章枉謙恭德業基青年登桂籍白首臥
江湄百里非賢路數椽與老宜懷忠恩未報終養
色常怡乍仕上堂水細傾憂國庀居鄉誠以接處
族誼偏施芳名畱鵷鷺幽興託鸕鷀自適行藏美
淡知物理推田園送老計經傳子孫遺積善爲家

慶二郎擢第奇門闌和氣溢盛滿戒心持典型今
寂寞和淚一題詩

又

族弟泰巖

廿五登龍壽七旬三州奉檄悅雙親草誠輝報西
山日榮利心灰紫陌春持己謙恭忘齒爵接人款
厚服鄉鄰庭前蘭玉連枝秀賸看來雲福履申

兩世科名聳一時大夫庭下注書兒佇看五馬榮
還地復享三牲孝養儀天上尻輪畱不得日邊恩
渥降何遲送公別有傷心處失母諸兒哭輓帷
端重儀形間世姿一生修養玉無疵聲名宜入時

人慕心行堪爲俗士規方喜吾宗存此老旋嗟泉
路送靈輜浦南寂寞卑窩閉門外誰迎長者騎

又

族弟泰益

東里卑窩裏溫溫渾是和初年勤誦讀餘日付吟
哦孝友迺天得謙恭賴學多公歸耆舊盡其奈吾
宗何

百年積德久福履宜綏之五馬榮闈日雙花曜戶
時方欣膺第祿誰識賦哀辭霽月清江上儀容惱
我思

愛吾公莫若相見討心眞依仰惟宗老孤榮柰此

身摩頭恩刻骨持戶訓書紳半夜高柴淚又霑洛
水濱

又

族姪文相

少小同經術雲泥路遂懸多公五福具憐我四竅
偏苟寄依無地全歸命樂天從今其已矣不覺淚
潸然

燭老歸泉後卑翁次第零人間我獨在其柰棟梁
傾

又

族姪緯相

雲峯蒼翠洛波清鍾毓公家獨挺生才德已歸當

世望功名能使闔門榮溫恭厚誼非緣飾孝悌醇
風豈勉成七十光陰驚一夢何時更見笑欣迎

又

族孫必熙

奕世簪纓福履綏人言名父有賢兒情親豈直同
源地衿韻相孚會面時閒雅儀容吾每仰謙恭心
事世歲知公歸獨有傷心處花樹蕭疏夕景移

又

族孫仁宅

親親莫若我同宗慕仰風儀自始終操省工夫從
少日謙冲心事質高穹七旬優樂林泉養兩世榮
名桂籍通自媿僑居違執紼悵望靈駕涕淒淒

祭文

李重和

嗚呼我公休聞夙敷豹變龍騰釋褐青陽晉塗且
闢匪藉推引攻駒符竹所至游刃蠲瘼撫瘵條明
惠滋湖嶺之民有去後思逸駕方啓周道孔脩詭
時不遇初服乃修一臥江湖歲月攔珊人爲公惜
公處之安惟名與利惟世所趨公有其具曷退而
輸迹混畦畛夢斷寮署遺佚不怨是公高處試較
乾沒亦云優休聿公緒餘我言非諛其華燁燁其
儀抑抑燁燁抑抑如金如錫相彼皎厲紛喪厥德
公不外耀倫常內篤萱闈日長棣華交影惟孝友

于不政亦政及其季年人望愈邵杜門斂迹與往
無報不隘不苟謹守其身允謙克恭無斁於人無
斁於人以永令名藍田有王早歟 王庭韋家父
子并美千古有來賀公非榮伊懼我聞是心誕膺
多祜君子萬年遐不壽考委命鼓缶奄具其離適
去何憾後死之悲記余交公爰自少日中歲以後
相與益密誓言修契寔緣同志時節衍遊賞心樂
事二酉新摩退集朱節敢曰有爲實賴施設分而
藏之兩家之寶抽帙拈疑參訂胥討洛浦武夷一
水盈盈源源過從命駕揚舲倒屣下階色笑以迎

翛然相向遺爆忘形邇年情親太半鬼錄與同衰
暮庸百年祝云胡一疾閱歲斯劇尚冀神保而收
勿藥始聞其幾急馳往偵語雖已澀心則猶驚喜
聞我至遽延以傍執手漣漣我非鐵腸掩袂出門
前道迷瞢歸裝纔稅素書旋蹤寢門驚呼老淚河
傾宇宙牢落獨立伶俜千歲在前百歲在後紫芝
眉宇何處覓觀每過西門使我心痺立馬彷徨誰
識我懷棘人戀戀於我眷摯言念宿昔邇追先志
俾也可忘中心是悼我告棘人世敦世好亦詔子
姓無替舊誼幽明之間儻識此意濡毫索誅情溢

辭蹙心香在辦可通冥漠我言有盡我慟無窮庶
賜來格嗚呼我公

又

進士李權

恭惟我公鸞鳳之姿金玉之質妙年釋褐位不稱
德賦歸高臥卅載田園盡孝家庭稱善鄉鄰心絕
浮渚性好恬靜晴窗淨几衣冠齊整墳典滿架披
讀終日賓客盈門應接如一餘慶所暨二郎登第
父傳子受青氈丹桂稀年加二康寧邁人白髮韶
顏平地神仙謂公遐算可期百年天胡不憖碩人
云逝顧余小子晚託芳鄰眷庇踰常無間至親感

激知愛鏤此心骨有懷必陳有疑必質今焉已矣
嗚呼安倣音容愈邈高山徒仰赤巖新山洛水之
北洞號道德君子攸宅著龜有吉卽遠在明望旒
翩翩執筆涕盈鳳嶽雲收浣溪月白匪公精神卽
公顏色辭不達意物不稱情靈如有知昭余中誠

又

進士安鎮龜

嗚呼惟靈需世之材幹事之器剛方之性端雅之
貌名登桂籍粵自妙歲若可大展命也小試專城
養至移忠而孝早謝功名返吾初服餘力則文誠
心見客螽羽魃魃螟誨式穀趾美仲胤取第如拾

門闌慶溢鄉黨譽洽公猶自謙卑以名窩窩中杜
律刀上朱書日用事爲豔人耳目可敬可師無惡
無斁顧余不敏猥荷偏眷誼追世鄰契濶侍尊先
君之忠以勸余身縱未克效其感而鐫竊幸尊體
望八猶寧假以數年金王其頂云何二豎沈嬰數
朔我往徂診六月初吉公時坐起勿藥尚遲慰以
秋蘇祈以春回那知此拜遽隔幽明瞻彼洛矣主
人云亾聞者驚怛知者慟惜矧茲孤露感淚先滴
居諸迭逝几筵將撤儀形永閔警歎愈漠一柩始
設悠悠我思文不盡言靈其顧余

又

進士金鳴九

恭惟我公冰壺曾衿玉潔儀容律己恬貞處世溫
恭推誠與人不修邊幅日用云爲頽仰無忤聲望
愈尊謙約愈勤飲德人醉聞風薄敦夙研經學一
意翰墨難疑問答發蒙河浚天道福善早日立揚
騫騰雲路榮養北堂投老東岡進退無苟餘慶未
艾三蘭又秀二郎繼業稱其家兒榮光所及疇不
羨斯顧余小子偏多感慕自昔兩家世有誼好暨
于先人與公同庚范張交契如弟若兄不肖險凶
夙遭巨創孤露此世廓然安倣粵在青牛忝託姻

姪源源踵門穩承款話不以愚魯特垂愛眷激勵
反覆隨事獎勸由是感激寤寐瞻仰竊瞰精力晚
年彌旺期以百齡永言追陪天不憖遺仙筭遽催
光陰易邁窀穸告期遠邇紛集雲慘風淒門扃一
閉江山失色古人風味何處更覲含哀致誠奉誄
虔告靈如不昧庶賜歆顧

又

金光天

嗚呼恭惟公門遠祖于萊育德流光百年遙遙禮
濯義澡世趾其美蔭蔭庭槐益大而肆譬彼槐木
幹支并茂公惟挺生神所錫嘏其德既有其畜既

富端雅物表精粹神彩自在髻髦人擬公輔名香
黃甲望重白碑謂宜彙進大鳴昌時才不命謀世
路坎軻汲老淮陽大闕小施哦松句香聽鈴心閒
人嗟其屈公視以分卷而懷之有河一曲杜門課
兒掃畹栽菊矜期晚託名利早謝孝友後陳情話
追陶天餉旣厚亦有神佑庭蘭獻桂二郎其做孫
曾稱家明珠可斗送迎門闐清白羶古優遊暮境
人豔清嘏溪軒有主岡祝無期那意一夕仙駕難
追顧台愚駢通家契兒登軒展拜喜掬雙眉疊疊
舊契款款新誼餘芬滿袖儕友堪誇筭公祺疇百

無不可生順死安有終有始日月如矢琴瑟只隔
一梧來哭萬古之設靈如不昧庶降茲酌

又

金達采

嗚呼惟靈蓬原世族嶠南聞閔襲慶育德生而聰
穎長而端正天賦之性早通經業名登桂籍聲譽
藉蔚三牲以養雙親無恙孝著鄉黨三蘭茁茂詩
禮以教家聲罔墜貳哥踵蹟龍門一蹴此豈人力
于門之大王氏之貴積善所致門闌煒煌鄉邦喧
騰不顯其光公猶謙抑卑以自牧一出悃悃薄彼
外物安我清福聽天真樂潛心典籍頤神風月地

上仙鶴遐邇願識送迎相接長者車轍身閒志定
七十二齡壽籌告盈無媿神明以公之才若能大
施何處不宜國家無祿位不稱德孰無嗟惜顧余
無似德門作贅來居鄰比憐我孤露恕我庸陋幾
垂誨晤自喜瀟劣如有所得相期莫逆今焉失之
萬事已非我將疇依墓草已宿琴祥奄迫幽明將
隔哀辭數幅薄醪一酌今夕永設物雖菲薄寸誠
斯託庶幾歆格

又

尹聘來

嗚呼公以經學早得科榮養於九十堂前以謙遜

持己以文行飭子弟對人之際未嘗有怠惰容門
有長者之車家有君子之嘏以善教仲胤顯於世
莫非公修善之應雲鶴之標精王之姿人所瞻仰
而余於公其居鄰交誼異於人所以服於公期於
公者亦不淺淺矣有如是才行有如是風標而蹈
其武滯其志不能奮迅於王署鸞臺之上而以數
邑宰終真可惜也而公未嘗苟求於心稽其田食
於家十晦間蹤迹閒閒萬卷上心目自靜暮年所
得優且富矣儻天假以數年則事業亦不止於此
而注書郎五馬之榮三牲之養可期於朝夕而仁

壽無徵大運將迫一疾浸縣奄有今日孰不驚愕
孰不涕洟略敘哀腔長痛而歸靈其知耶

又

門生南師中

嗚呼雲岑嵯峨洛流滢淙淑氣攸萃鍾毓我公王
色丰容鳳毛奇彩龍門一蹴紫綬三佩早謝功名
晚韜林泉閒臥高堂車轍盈門迺圖迺書頤養神
精三枝寶樹一桂傳芳棣萼交暎和樂且光如斗
如岳人皆景仰模楷後進影臬鄉鄰顧余小子自
造門軒愚蒙不棄教誨特殊誘掖獎勵肝膈以輸
不善承訓頑鈍莫移小子無祿仙駛遽催孰謂泰

山忽爲黃壤冥路顛倒痛徹于穹從茲以往奚依
奚仰單柘酌告靈其格享

又

柳 述

嗚呼竺山峨峨洛水瀝瀝憂念之洞元氣之會地
靈所鍾挺生人傑經國之器濟川之楫妙年登第
世爭稱美湖嶺澤流人皆墮淚晚年投紱樂專養
志萱闈日長棣牀萼韡滿室蘭玉箇箇人望白眉
最良家聲益昌一堂丹花兩代交暎天實申佑稀
世之慶得盡天年逝將頽然生順沒寧餘無憾焉
第惟小子忝入門闌春風座上每襲芝蘭迷途擿

埴幾蒙指揮梁木其摧吾黨靡依居諸易得再暮
奄迫仁宇永閔德音愈邈求之莫及慟矣何追一
字千淚永設于茲

又

族從之鍾

惟靈秋水精神海鶴形貌早通經籍聲名獨步一
蹴登龍廿五青年衣錦還鄉具慶堂前歷宰兩邑
養盡三牲家道以肥鶴筭無疆事親日短鍾鼎奚
貴情深烏鳥迹謝鵷鷺萊公彩舞兄及弟矣謝家
寶樹子若孫也君子三樂公有其一人稱完福今
古罕匹自泣風樹無意出腳丘園日月春睡自足

寵辱何干憂樂兩忘優遊送老七十二齡白眉最
良能繼家聲桂萼交暎新舊恩光擅名朝端榮養
在卽云胡一疾沈緜數朔時時往診疊疊情話中
心默禱謂獲神佑天道難恃遽呼東甯惟我與公
不獨親族居同比鄰年又間一自少遊戲無異隊
魚多君才逸媿我質虛雲泥路殊參商間闊聚散
無常夢想徒切中年以後君意沒退暮境追逐益
敦情好山齋書社談笑日夕相期百年永保此樂
今焉相失我懷曷極去歲月臘君旣棄我今年仲
春春雨又逝一門耆舊次第零謝白首人間我獨

踽踽有事誰咨有疑誰質言念及此不覺哽塞念
君平生疇不愛敬範我門族儒厥心行謙恭自持
齒德俱忘律己有度處事周詳間以吟詠寶唾盈
箱大人門庭長者車轍款遇以誠披出心曲今也
則無曷勝痛惜壽考歸全在君無憾位從三品較
才猶謫儻假數年天爵可致帶金冠玉榮光祖禰
丈夫能事孝忠可展生未遂願死有餘恨卽遠有
期靈輜將駕白華山下良玉空埋一器魚果物雖
菲薄微誠攸在庶賜歆假

又

族弟泰益

箕之敘五福一曰壽次曰富又繼之曰康寧好德
考終命今以公較之殆幾矣乎况妙齡登第策大
名躋膺仕內而顯名父母外而畱愛郡邑仲胤又
一蹴而登龍是父是子簪纓奕世六親無恙充堂
而衍宇三子賢秀誦詩而學禮秩秩有序和氣藹
蔚人皆目之以完福公於斯世一無所憾而不佞
竊有私痛昔吾先君與公年間數世居同一坊竹
馬託契道義以相勗患難以相恤披黃談古照丹
論懷其相與之意不但門族而止先君每戒不肖
以善事公也先君棄孤之後公不以無似爲棄眷

厚而親愛之不啻若親弟而輒賜顏色有懷陳之
丁丑冬不佞邁疾公枉委問勸飲撫頂漆夜而枉
徬非眷我出尋常何能迺爾銘骨鑄髓欲忘不得
又况煩惠瓊韻說得無限厚意公去後每日一誦
畱作傳家寶未知吾兩家子孫有能知今日情分
之如是而不替引之耶嗚呼公之質溫而和公之
行謙而恭事父母就養無方處宗族恤睦有道以
至鄰里賤氓無不得其歡心持心行己無媿古人
當官處事一遵家政斂衿端坐凝然有長者風度
對越聖賢討論墳籍藹然有雅淡儒致及其花朝

月夕逍遙散步於水石之間儼然有碩人考槃之態一身三達百行備具雖古之仁人君子蔑以過矣私竊謂吾門有此耆年碩德門內後生有所觀感而依歸孰謂一疾觀化使門內後生無所觀感無所依歸也耶迺者不佞遊士友間遠近老少咸曰惜哉大老云亾斯可見公德性入人深服人衆者矣外人猶然況於族親乎況於愛公深慕公篤如不佞者乎嗚呼幽明殊制卽遠有期寢門長號警欬莫聽和順仁愛之德簡重閒雅之儀何處更得奉接也

又

再從弟重龜

嗚呼公之天賦優優美矣夫人生斯世每如公死
復何憾公享年踰稀壽平生事行可師一世而且
芝蘭滿前榮光耀戶則公之於世也豈不謂優優
美矣乎宜無所憾而夫何使我失聲長痛而悲慨
不已也嗚呼中年以來禍殃相乘父兄先行次第
零謝自餘老少諸親又相繼淪沒天之禍吾門何
至此哉昔年一堂聯裾之樂已寂寥矣今日後生
孤露之感將無涯矣所恃以爲依仰者惟公歸然
獨在而齒德言行可以長一家庇一門則家門之

所依仰於公者其重何如也如小弟之孤露旣無兄弟伯叔之親恃公猶父兄則其相恃相愛之情奚啻家門所依仰於公者耶出門輒聯裾有事必仰質凡其大小休戚無不是同常以爲鶴髮龜春可享期頤那意今日大筭遽窮使我永失依仰之所耶萬事如是是豈非小弟之所可私痛而悲慨不已嗚呼小弟生後於公十有四年而與同斯世者今五十八年則其風韻之美德業之盛是所目擣而心誦者也公早登科第累蒙恩渥一郵二郡治化丕彰事親有專城之養祭先致大夫之禮及

其親齡漸高不可遠離則退居家鄉久奉庭闈怡
怡愉愉克修子職至於延接之節固有親疏而惟
致誠厚苟非孝友之實敬謹之至其能如是乎是
以遠近見聞莫不服從更相稱美且中蘭克肖能
繼舊氈名付桂籍身在朝列目前之榮身後之祿
其將何如哉所謂公無憾於存亾者良以此也居
諸不畱祥日在明月滿東窗靈必徜徉一柸瓣香
萬古長辭

又

舍弟重岳

嗚呼痛哉兄乎豈忍舍我而去耶舍我猶可獨不

念未笄之三女嗚呼人生脩短各有定算而七十二年是兄之定命耶抑門衰祚薄天降酷罰而減促天年耶念昔先考伯仲公棄捐諸子姪孤露吾輩廓然靡逮而惟我從行不甚零星比屋相居聊相依倚往往四五年間舅季四公相繼淪沒齒德重望惟兄在耳棟梁我宗族模範我後人若子若姪若老若少莫不依仰與共憂喜而柰之何一疾沈淹竟至於斯嗚呼公與我爲兄弟於人世六十年于茲矣兄之愛我我之恃兄六十年如一日而自兄登科筮仕有時分張黯然魂消粵自己亥兄

始從官記馬海西作宰湖南而我輒隨兄駟騎來
往極目遊賞居養隨意於我過分而實兄之餘裕
耳我性粗暴而兄能容之家食艱難而兄常憂之
吉慶同喜險凶相慰不皆一日相離而幽明之隔
倏已五箇月矣忽忽焉茫茫焉無所憑依自今以
往孰能恤我之孤窮牖我之昏愚哉嗚呼兄之言
行非弟所敢追述而出塵之儀高世之操實有不
容泯默者矣旣自立揚榮光祖宗仲姪繼業莫不
稱慶而兄不爲喜其謙謹之德出於天賦也頤養
丘園優遊文墨神思氣力老而彌旺將可以克享

遐齡茂膺純嘏而壽筭只止於稀二遺恨又多於
臨終此誠未解於天理也嗚呼念我窮獨生而無
一分世況而強飲食以度朝夕更有何望於此世
哉只有患兄之心有事而患有食而患有憂慶而
患對文墨而患有寂寥而患有團圓而患日用云
爲無處不患一日而有一日之患一年而有一年
之患未死前無非患兄之日未知何年何日從遊
於地下以敘此懷也嗚呼仲姪之妙年登敷豈不
榮幸而天不假兄十數年竟未奉專城之養是其
平生餘憾而兄沒未卽上聞客臘郵官之除又在

旣疚之後此際感舊悲咽尤當何如嗚呼哀懷積
中曷可究罄心寒臆塞吞不能吐伏惟不昧之靈
庶幾默諒我不言中心緒矣

知舊酬唱

赴任務安時別章

族從錫鵬

百里治民賀三刀之叶夢五馬戒道贈一章之贐
行君且遲遲我則戀戀伏惟錦城使君東萊望族
南土一人早年登龍已遂顯揚之志中歲掌駟謾
屈經綸之才柳下惠之小官不卑君雖無怨賈太
傅之大才未試人皆有歎十年不調飽經旅館之

辛苦一心無改恥效俗士之干求方歎積薪之餘
遽膺分竹之寵與我共理也可使爲政焉旣分九
重之憂賸做一方之治利器未別盤錯奚取佩符
之榮專城可供旨甘蓋出奉檄之喜才學宏博佇
見武城之割雞行李蕭條殆同趙抃之匹馬茲當
啓程之日爲進贈行之辭落日都門那堪離別之
恨送客南浦暗銷去畱之魂握手將分不效兒女
之態以言相贈竊附勉旃之忠一句爲民父母寧
忽撫安之誠受人牛羊宜盡芻牧之念晉陽之繭
絲是除尹鐸之政無傷膠東之戶口爲增吳公之

治第一廉叔蜀郡人唱來暮之調黃霸潁川民有
去後之思固知今日之行政不可佗求宜遵古人
之做治毋使專美重念錦城之地僻在鯨海之邊
上化方隆宜無遠近之異人心叵測或有欺詐之
歎學校不興詎緩振作之務名分已壞宜救陵替
之風剛柔相濟可折猾吏之姦萌寬簡爲治足慰
小民之渴望念切陳戒寧嫌辭旨之拙蕪書不盡
言惟在使君之默會伏念族從同宗義重接鄰情
淡折柳枝於離亭曷堪惜別之恨摻子手於祖席
爲贈送行之篇

己亥仲冬奉和鄭梁山

正字金達元

傳舍蕭條悵獨留孤燈明滅伴夜愁逢迎禮厚開
青眼進退憂深到白頭千里歸鴻驚倦夢一函新
月慰旅遊二松相對吟哦處杳字徐閑世念悠

孟春贈鄭梁山

進士徐廷望

薄宦西郵久屈名公庭無事世情輕白雲幾入思
親夢赤日常懸戀闕誠客上龍門爭美價水露魚
轍仰仁聲疏慵自媿南州士肯許陳蕃下榻迎

仲夏贈別鄭梁山

進士慎爾大

駟騎衝泥叩小堂愛看庭菊與門楊柘傳官酒春

猶漲檐納江風夏亦涼正好詞章誇錦繡肯將榮
悴較閒忙恩恩逢別還如夢何日重聯夜雨牀

秋日訪鄭侯因成一律

察訪鄭忠大

生在嶠南識在京靈犀相照兩心情芹宮講討寒
燈遽漢水遊從片月明秫酒微醺愁易豁芝省一
見意還平感君高義能全昔始信人間有友生

李夏與鄭侯共次唐韻

進士徐仲久

水漲樓前夏日長登臨收拾好風光談飛玉屑交
情穩筆寫瓊詞句語香陳榻申勤知未易袁栢潦
倒亦無妨滄浪濯足心神忭不必蘭舟泛泛湘

訪鄭侯於錦城東閣仍成一律 俞聖達

折得寒梅未贈君
何時罇酒更論文
別來鴈字三江阻
隨處蟾光兩地分
佳約已成難計日
世情多變恐翻雲
故人曾不酬詩債
夢到鈴軒索句勤

充養齋奉和鄭侯 俞聖達

嶺外新春客尋來
漢水陰兩鄉
千里面一片
百年心覓酒嫌邨
遠論文愛夜
深只愁分散
易虛費短長吟

早夏奉呈鄭侯 進士鄭鳴瑞

促膝成佳會
風軒麗日長
疏簾抽綠葉
叢桂送清

香太守勤開榻書生媿面牆
淮陽何厭薄山水道
茲鄉

與鄭侯共吟二首

姜永爾

倦客錦城館朱欄控海通
寧愁沈酒病堪笑惱詩
窮細草煙拖碧幽花雨濕紅
南州高士少懸榻尚
清風

此會眞萍水靈犀一點通
勳名明府貴身世謫仙
窮亂鬢侵霜白衰容借酒紅
不妨荒歲醉醕酤倚
春風

居充養齋奉和鄭侯

俞鴻漸

軒豁清風至，燈明皓月添。
偶成良夜會，詩酒一兼兼。

又

吳時觀

蜀郡文化日，南樓庾興添。
千年勝事後，兩美更看兼。

充養齋與鄭侯共酬

別將朴

鼎坐良宵月，出東靈犀一點暗。
相通騷壇秉筆詩，無敵官閣攜樽酒。
不空千里萍逢湖海外，百年蘭契笑談中。
人生會合誠難再，卻嘆光陰似轉蓬。

鄭孝子國瞻，舅季爲八十八歲，大夫人設爵。

于壬申九月二十二日稀世慶也安

光世病

不能赴謹次其韻

安光世

蓬萊仙子舞翩翩獻壽高堂鶴髮前從古至誠天
亦感也應申命百千年

又

李溟

阿母屏間彩舞翩碧桃花老壽罇前今來幸添華
筵末獻祝千千萬萬年

又

進士洪禹疇

萊衣七十猶翩翩斑斕爲畱慈母前此事君家今
復覩填門車馬賀高年

又

同樞鄭游龜

設宴佳辰彩舞翩冰桃交錯北堂前從知福應自然理住世何難五百年

又

全謙濟

南州府檄昔聯翩喜溢高堂鶴髮前天佑純誠添壽慶瑤池勝宴又今年

又

李之郁

白首斑衣舞翩翩佳辰獻壽北堂前休言久曠專城養人世稀看九耄年

又

進士安錫龍

有鳥反哺飛翩翩彩舞龍城鳳宙前卻恨舊時同
里伴還違筵末祝遐年

又

族從之鑠

琴歌迭奏舞翩翩王母瑤池宛在前南國不曾看
此事筵中彩服亦稀年

野亭秋日客聯翩爭祝岡陵列後前安得龍眠圖
此會風流輝映百千年

多君七十彩衣翩至樂融融鶴髮前獨我偏溪風
樹感臨筵空憶拂髻年

又

權礪

王母人間下降翩蚌珠燦燦滿庭前賢郎早折蟾
宮桂獻壽榮光輝萬年

又

李澈

慶席高開舞袖翩壽觴爲獻北堂前瓊桃昨夜流
餘影來照萱闈萬萬年

又

尹憫

秩秩華筵彩舞翩萱花無恙北堂前多公賸得神
明佑爲把春杯祝萬年

又

南琰

棣萼交輝雙袖翩高堂鶴髮壽筵前萊公七十斑

衣舞今日復觀白首年

又

全是權

南州佳客盡聯翩獻壽罇開彩舞前勝事誰傳王
母宴蟠桃春色祇延年

又

李受鼎

清晝高堂鶴髮翩慈孫孝子滿庭前鰥生病未參
高會只祝華筵設永年

又

進士尹燾

七十斑衣舞袖翩無於今世罕於前莫誇王母瑤
池宴較列仙娥第幾年

又

安維世

自天仙鶴下翩翩畱在龍城鳳宙前中有二雛效
反哺响然至樂指千年

又

全斗采

愛看烏兔影翩翩幾祝親齡北斗前百行源頭多
喜慶應知奉檄又明年

又

李 楔

莫羨天仙鶴背翩人間五福壽居前六旬兒侍九
旬母設宴邀賓歌永年

又

李壽海

時節方佳舞袖翩慶筵高闢北堂前一鄉老少咸
來會爭祝岡陵於萬年

又

蔡應禧

秋清江上菊花翩壽爵高開鶴髮前白首彩衣真
罕事爲將賀語播千年

又

金世龜

庭下萊衣影共翩蟠桃花暎壽罇前人間勝事今
重見追感吾家戊子年

又

李元國

白首斑衣戲舞翩後來難覩又無前頻攜壽酌高

東宮文集卷之四
堂進夏祝南山萬萬年

又

權彙

瑤池羽駕下翩翩慶席高開洛浦前庭下白頭攀
桂子拜斟春酒祝龜年

又

李祥運

麻姑下降世間翩萊子斑衣日戲前北海罇傾南
嶽祝菊秋佳節壬申年

又

金瑞昊

像想高堂舞袖翩孫曾四世一筵前祇今遠近親
知祝無限來年似去年

又

鄭峯

萱草長春孝鳥翩南山壽獻北堂前
疏慵病未參高宴華酌金罍祝萬年

又

申浩

望七彩衣舞袖翩萱堂第祿夏無前
諸孫爲壽琳琅映請問君家種德年

又

裴是楨

佳節南鄉客旆翩一辭同賀壽罇前
萱花不老人咸仰喜懼深誠祝萬年

又

柳宅華

慶老筵中彩舞翩南山獻祝北堂前
猗歟孝子誠
渾篤榮養專城在昔年

又

閔希參

獻壽斑衣席上翩爲歌爲舞北堂前
年年此日來
無盡惟願華筵設每年

又

閔瑞龍

寸草誠心彩舞翩萱花春日北堂前
爲君今夕無
窮祝南極祥光照萬年

又

金僊

高設華筵舞袖翩稀今之慶亦稀前
知君誠孝天

應感堂上餘年又萬年

又

金 佺

千載萊衣此日翩一般誠孝北堂前爲君且獻南山祝不騫不崩享萬年

又

族弟泰益

白首雙蘭舞彩翩萊公豈獨美於前萱闈慶溢華筵敞稱彼壽觥祝萬年

又

族姪文相

清歌妙舞亂翩翩令子賢孫列眼前最羨公家樂事極感懷還發憶親年

史官文集卷之四
三
闔境爭來舞袖翩
碧天霜月影罇前
人間七十猶
稀罕况是九旬近百年

知舊往復

權清臺

相一

客冬對吏時累蒙說問而脫後卽發未暇面謝迨
今感媿獲聞出宰鄰邑心甚欣倖想已到任無撓
政履珍勝雖不卽奉顏面而音聞相續足慰積阻
懸係之懷也相一不得已復還官次而頓無仍關
久畱意累辭圖遞而迄未能末實媿素心柰何通
度形勝欲一見而尚未果四月嫩綠當期會逢討
於此寺姑先侔書替伸統惟四月念間欲作通度

之行未知無故否

又

權清臺

戀仰中承黷惠札細審近間政履珍福感荷無已
兼任劇邑賢勞倍甚爲之泝慮相一身病過暑添
苦且旱灾太甚景色愁痛秋間賦歸之計亦恐因
此礙掣寢食不安一日難過奈何奈何鄭君相見
甚喜

又

權江左萬

南中一麾得遂榮養之願奉檄之喜可知自此又
脫卻夙夜在公之勞種種二字梁山有三叉水七

點山之勝兼江海之珍牲養不患不足雙樓嘯詠
興味自別豈不爲使君賀哉辭朝在何間過路幸
歷問病生也孫結城見任何處如對爲致病無書
之意也

又

李大山

象靖

五馬翩然南下此身恨不與俱矣卽候侍餘行李

萬重

象靖

尚此維繫歸計未遂只有此心日夜東

流耳紙簡之惠極荷見念草此付遞以謝不宣伏

惟

又

朴臺憲

文秀

卽承便中惠書以審初寒返官政履萬勝慰荷無
已此間猝當劇務殆不可支吾當此凶歲何以接
濟爲之慮念不已

卑窩文集卷之四

終

跋

今距卑窩公之世殆近二百年其遺文二冊始行于世何其晚也蓋公之志先立乎遠大將黼黻皇猷陶冶斯世垂大名於天下後世觀於九歲之得鄉選而推與人者豈不信然乎雕花篆綵耀人耳目公所不屑也謙卑自牧不求人知故歷七世而巾衍者亦公之志也公之胄孫正郎玄謨氏懼夫愈久而泯沒蒐拾家藏將付剞劂未就而謝世其嗣鎮華繼志而成吁其盛矣何慨于晚今讀其書則事親而盡養生慎終之節鄉邦稱其孝立朝而

陳歷代興亡之蹟蒙博洽明悛之 睿獎出而牧
民賑飢興學致閭巷歌謠之盛此皆有得於修齊
治平大人之學而及退江湖心懸魏闕慷慨激切
之懷俊逸英爽之氣有時發現於措辭行墨之間
恬淡宏麗天響悠然亦可謂範俗之文章也嗚呼
以公素蓄之富得可爲之世蜚英臧朝受知於時
君庶可以展堯舜君民之志而卒爲憮人所沮戲
低徊中道卷懷而歸終老林巷從古君子之難遇
果如是哉鎮華君要與之丁乙訖復請識其顛末
於後余復之曰公之行在集中揚扅在狀碣更何

贅愚言因辭之而旋念建模於公欽慕已夙爲公
而役亦後生之幸也遂識之族晁孫建模謹識

恭惟我卑窩先祖下世距今百七十餘年之久而
遺文徽蹟藏在巾箱散逸殆盡餘存無幾宗姪正
言玄謨甫嘗與不肖蒐拾零星將欲付梓未就而
歿不肖亦衰病轉欲精思日耗若一朝溘然則因
循玩愒或恐先蹟之愈久愈晦而不肖之痛恨詎
有窮已然而事重力綿不敢率爾試役迺者門議
竣發合謀鳩財使族弟寅吟掌其任而監董焉歲
幾周而工役告竣嗚呼府君之嘉猷懿範始顯於
曠世沈晦之餘爲後承者開卷奉讀油然而有悽惻
追慕之心矣豈非一幸而一感者歟略敘所感于

中者如是云爾六代孫寅彥謹識

惟我七代祖卑富府君之德學文章孝友實蹟不
肖不敢妄自闡揚况載在於諸賢之狀碣序識中
詳者乎嗚呼世代沈遠遺文散逸蒐傳巾衍者雖
甚零星亦足爲全鼎之一臠也何幸門議竣發合
謀壽梓而繼之以鄉道士林亦多贊助謄寫勘校
編爲二弓詩書輓祭筵說等若干篇茲付于剞劂
嗚呼使府君之遺光賸馥不至全然泯沒斯文之
顯晦亦有時而然歟編旣成略識顛委于後七代
孫璵謨拜手謹書

惟我先祖卑窩公遺文藏在巾衍者迨近數百年
于茲矣而中間累經水火之災且被蟲鼠之危散
落逸失存者無幾豈非子孫之痛恨哉在昔先父
兄常惕然于是圖所以鋟梓而事鉅力綿經始未
畢不肖輩敢體遺志收輯箱篋之餘存芻按世誼
家所傳謄寫已畢因經二三長德攷訂編成二弓
付于剞劂嗚呼先祖之學問志尚諸先輩往復酬
唱略可見矣事行實蹟當世之信筆序若狀碣備
矣非孱孫之所敢措一辭而顧惟誠淺識昧不能
廣按詳攷今此裒粹遽忽疏略不無未盡底意然

先父兄累歲經營之志庶幾得遂於今日則又豈
非後承之一感一幸歟茲不揆僭越略敘顛委于
卷末七代孫升謨謹識

竊惟我卑富先祖遺文藏在巾箱者已積百有餘
禩而散逸過半先君子嘗慨然于此廣求狀碣於
當世秉筆卷帙已備而未克壽印奄忽下世嗚呼
痛哉若又荏苒時月則府君遺蹟將至無稽矣豈
不戒懼哉粵在甲子冬稟于堂內長老與從叔協
謀出力門議一致鄉省世契家亦多贊助圖所以
傳後是役也族祖寅吟氏挺身擔夯終始矻矻事

力就緒茲經一二鑑裁編爲二冊付諸手民凡四
閱月而功告訖嗚呼使府君之幽光潛德終不至
泯沒亦可見先君子遺志宜有今日也篇帙雖零
星足以爲子孫傳家之寶矣亦何傷哉略敘顛末
少伸追慕之誠云爾八代孫鎮華謹識

昭和七年七月四日 印刷
昭和七年七月八日 發行

慶北大邱府南山町一四四

編輯兼發行人

權相河

慶北大邱府新町一〇六

印刷人

權相周

慶北大邱府新町一〇六

印刷兼發行所

津堂

